

## De Flerschemer Deich

Also doo war su e Verostalldung in de Stadthall und doo isses um de Moodomm gonge, der wo sisch vunn Flerschem bis Edderschem hiehziehe dut. Der iss marodd unn muss nei gemachd werrn, in e paar Johr.

Doo hawwe su enn Spezialist unn su e Spezialistin mett Plän dene oowesende Leit beibrenge wolle, was su alles doodeferr gemachd werrn muss. Weil su enn neie Domm, der sieht joo onnersders aus als wie de alde unn werrd dessdeweese aach nitt mieh Domm, naa, der werrd jetz Deich genennd. Unn der neie Deich soll e Hochwasser zurigghalle, wies alle 200 Johr oomol vorkumme dut. Awwer nitt grad in 200 Johr, naa, dess kennt aach schunn moie soi unn donn 200 Johr iwwerhaupt nimmi. Wer's glaabt, werrd seelisch.

De Deich soll also dess Wasser nitt nor vunn Flerschem ewegg halle, der soll aach su gebaut werrn, dass enn Deil vunn dem Hochwasser uff die Wisse zwische Flerschem unn Edderschem enoilaafe dut, droi bleibt unn bei de erstbest Geleescheheit widder in de Moo zurigg leeft. Hoffendlich waaß dess Wasser, was ess mache soll.

Isch war aach in de Stadthall gewese unn wie isch den Plon vunn dem Deich geseh habb, habb isch onn de Theodor Storm gedenkt unn onn soi Novell „Der Schimmelreiter“. Weil doodroi giehts drum, dass de Deichgraf mett Nome Hauke Haien ess gar nitt su leicht gehabbd hott, soine Leit beizebrenge, dass nor enn neie Deich meddere neie Form die hinnerm Deich gebaute Heiser unn die Leit doodroi vorm Nordseewasser schitze dut. Unn der Deich vumm Deichgraf hadd die selb Form, wie se jetzt de Moodeich hawwe soll, schee sonft vom Wasser her oostehend.

Isch denk, die Novell misst unsern Beijemoosder einische Flerschemer Leit in de Edderschemer Strooß unn in de Artelbriggstrooß zukomme losse, weil die Stadt enn Labbe vunn ihrne Grundstigger, die jetz bis korrz vor de Domm reiche, abkaafe muss, weil ohne die iss de Deich unnerhalb vunn dene ihrne Heiser nitt ze baue. Onn de Nordsee duts haaße: Wer nicht deichen will, muss weichen! Su schlimm isses awwer in Flerschem nitt.

Wenn de Deich emol ferrdisch iss, muss der ständisch kontrollierd werrn unn doodeferr werrds su e Art Deichgraf odder Deichgräfin brauche, unn wens nooch dem Theodor Storm gieht, misst die odder der meddem weiße Gaul, also emm Schimmel, bei Hochwasser jeden Daach den Weesch hinnerm Deich abreite unn sisch irschendwonn, wenn dess Wasser trotzdem in die Stadt Flerschem kimmt, mettsomd soim Gaul in de Moo sterrze. Jetz saach kooner, was enn Bleedsinn vunn dem Honnes, weil su ebbes wie enn Deichgraf odder e Deichgräfin (wer dess soi kennt, habb isch schunn im Kobb) duts in gons Hesse nitt gewwe, nitt onn de Fulda unn nitt omm Rhoi. Awwer grad dessdeweese, weil de Deichgraf odder die Deichgräfin vumm Artelgrawe bis bei de Gänskippel reite dut, wär dess e Attraktion unn die deet vill Touriste nooch Flerschem locke, ess misst joo nitt jeden Daach geritte werrn.

Egal wie dess werrd, mir Alde dun droodenke, dass zu unserne Zeit, wenn mir junge Kerle noochem Fassenachtsdonnse im Saal vumm Herrsch meddem Mädsche hoomgonge sinn, mir ab unn zu gesaad hawwe: Mädche, mir giehn bei die Erleben unn e bissi weider, weil de Domm iss geheizt.

Awwer isch glaab nitt, dass ooner vunn dene junge Kerle heitzedaach su ebbes saache dut, weil heit duts haaße: Gehn wir zu Dir oder zu mir?

Eiern Honnes